


CAHIER DES CHARGES



generiert mit AI



Mai Choix

sne

syndicat
national des
enseignants
cgfp

**CAHIER DES CHARGES
2024
DU SNE/CGFP**

Le présent cahier des charges a été rédigé par le Comité central du sne/cgfp suite aux rencontres avec ses membres et les présidents et membres des comités d'école lors des réunions régionales organisées en 2024.



Encadrement vu Kanner mat spezifische Besoinen oder mat spezielle gesondheetleche Besoinen

a)

An de leschte Joren ass d'Zuel u Kanner mat spezifische Besoine staark geklommen. Obwuel d'Ressourcen zwar och am selwechten Zäitraum eropgaange sinn, ass dat awer laang net an deem Mooss geschitt, wéi sech d'Zuel u Kanner, déi eng spezifesch Betreuung brauchen, erhéicht huet. D'Resultat dovunner ass, dass d'« Prise en charge » vun dese Kanner op ville Plazen net zefriddestellend assuréiert ass an doduercher d'Qualitéit vum Encadrement vu Kanner mat spezifische Besoinen sech weider verschlechtert huet. Dofir huet sech d'Situatioun fir d'Enseignanten dramatesch zougespëtz. Si sti virun engem groussen Dilemma. Trotz engem enormen Engagement an engem gewaltegen Asaz, géllt et net méi, de Kanner, déi Ënnerstëtzung brauchen, esou ze hëllefen, wéi si et brauchen.

b)

Derbäi kënnt, dass et an eise Klassen ëmmer méi Kanner gëtt, déi verhalensopfälleg sinn an dass des Opfällegkeeten och ëmmer méi u Gravitait zouhuelen. Et gi méttlerweil ëmmer méi Situatiounen, wou een eenzege Schüler den normalen Unterrecht esou vill stéiere kann, dass en normaalt Schoulhale massiv erschwéiert an a munche Fäll zäitweis esouguer onméiglech gëtt. Dëst huet och negativ Repercussiounen op déi aner Schüler, déi awer och e Recht op eng « intakt » Schoulzäit an en ongestéierten Unterrecht hunn. Net ze schwätze vun der psychescher Belaaschtung op d'Enseignanten, déi esou schwierig Situatiounen ze geréieren hunn.

c)

D'« Prise en charge » vu Kanner mat spezifische gesondheetleche Besoine stellt d'Enseignanten och ëmmer méi viru grouss Erausforderungen. D'Responsabilitéiten, déi d'Enseignanten dobäi huele mussen, sinn hinnen an enger ganzer Rei Fäll net zouzemudden. Den Enseignant ass e Spezialist an der Vermëttlung vu Léierinhalter a kee Medezinner. Et ginn eng Rei medezinesch Interventiounen oder Manipulatiounen, wou den Enseignant och am Kader vun engem « Projet d'accueil individualisé PAI » d'Responsabilitéit net iwwerhuele kann.

Fir deenen 3 verschiddene Problematiken entgëntzewierke fuerdert den SNE/CGFP:

- Dass déi am Koalitiounsaccord ugekënnegten **Erhéijung vum Kontingent vun den « Instituteurs spécialisés dans la scolarisation des enfants à besoins spécifiques I-EBS »** schnellstméiglech an d'Realitéit ëmgesat gëtt. Dofir verlaangt den SNE/CGFP, dass e Rekrutéierungsplang fir déi spezialiséiert Léierinnen a Schoulmeeschteren opgestallt gëtt, deen de Besoinen an den Ufuerderunge vum Terrain Rechnung dréit.
- Dass genuch héichqualifizéiert Personal aus alle Beräicher rekrutéiert gëtt, fir d'« Equipes de soutien pour élèves à besoins spécifiques ESEB » ze stäerken. Dofir verlaangt den SNE/CGFP, dass och hei **e Rekrutéierungsplang** opgestallt gëtt, deen de Besoinen an den Ufuerderunge vum Terrain Rechnung dréit. Et geet awer net nëmmen duer, d'ESEB en zueleméisseg opzestocken. Den SNE/CGFP fuerdert ausserdeem, de Fonctionnement vun dësen Ekippen ëmzeänneren. Den SNE/CGFP fuerdert, dass dës Ekippen nom gutt funktionéierende Modell vum I-EBS direkt un d'Schoulen affektéiert ginn, fir dass d'Ressourcë séier, effikass an onni bürokrateschen Opwand un d'Kanner verdeelt kënnen ginn. Dës Mesure géif och derzou bäidroen, d'Zesummenaarbecht tëschent dem Agent aus der ESEB an dem Léierpersonal ze vereinfachen a méi effikass ze maachen. Des Weidere fuerdert den SNE/CGFP, dass den Agent vun der ESEB ersat gëtt, wann hien ausfällt. Dofir misst endlech och fir d'Personal vun der ESEB eng funktionéierend « Réserve de remplaçants » en Place gesat ginn.
- Dass **an alle Schoulen eng Präventiouns-, Hëllef- an Interventiounsstruktur (Taskforce)** bestoend aus Spezialisten aus verschiddenen Domänen, wéi zum Beispill Educateuren, Infirmieren a Sozialaarbechter, fir nëmmen déi ze nennen, en Place gesat gëtt. Dëst Personal kéint bei der Betreuung vu Schüler mat Verhalensproblemer oder mat anere Problemer intervenéieren. Ëmmer wann et an enger Klasse brennt, kéinte si zum Asaz kommen, fir dass den normalen Unterrecht net gestéiert gëtt an normal weiderlaffe kann. Des Weidere kéint des Taskforce bei der medezinescher Hëllef fir d'Schüler am Kader vum « Projet d'accueil individualisé (PAI) » souwéi an der Ëmsetzung vu präventive Mesuren intervenéieren.
- Dass **de Fonctionnement vun de Kompetenzzentre** fundamental geännert muss ginn. Et kann net sinn, dass verschidde Kompetenzzentre sech just fir de Coaching vun de Léierinnen a Schoulmeeschter verantwortabel gesinn. Mir brauchen dat spezialiséiert Personal, wat jo op Grond vu senger Ausbildung beschtens geeegent ass, fir mat de Kanner ze schaffen, um Terrain an eise Schoulen.



Dofir fuerdert den SNE/CGFP, dass déi Kompetenzzentren, déi keng Kanner an eegene Klassen ophuelen, hir Ressourcen an d'Schoule schécken, fir do um Terrain mat de Kanner ze schaffen. Ausserdeem dierfen d'Kanner, déi Hëllef brauchen, net weider de Spillball vun deene verschiddene Kompetenzzentre bleiwen: Fir deen ee Kompetenzzenter ze schwaach a fir deen aneren ze staark, mam finale Constat, dass d'Kand nach ëmmer am beschten an der normaler Klass ouni zousätzlech Hëllef opgehuewen ass.

- Dass Schüler, fir déi während enger bestëmmter Zäit eng Beschoulung op Grond vun hirer Problematik a reguläre Klassen net méi méiglech ass, temporär vu **spezialiséierten Zentren** oder Institutiounen opgeholl a betreit ginn. A verschiddene Fäll sinn d'Problematiken an d'Verhaltensopfällegkeeten esou déifgräifend, dass fir dës Kanner d'Beschoulung net méi prioritär ass, mee dass aner Problemer iwverweien an eng Participatioun um Unterrecht an den Hannergrond réckelt. D'Schoul ass net de Kader, fir deene Kanner deen néidegen therapeutesche Suivi ze bidden an d'Schoulpersonal verfüügt och net iwwert déi néideg Kompetenzen, deene Kanner ze hëllefen. Dës Kanner sinn da besser an enger spezialisierter Institutioun opgehuewen, wou si therapiert gi mam Zil, si erëm prett ze maachen, fir um regulären Unterrecht an der Klass deelzehuelen.

- Dass **d'« Procédure de saisine » vun den Inklusiounskommissiounen (CI, CNI)** fir d' « Prise en charge » vu Kanner mat spezifische Besoine vereinfacht a beschleunegt gëtt. Fir dass et méi séier geet misst d' « Commission d'Inclusion CI » méi dacks zesummekommen, fir der héijer Demande nozekommen. Ausserdeem muss den administrativen Opwand op e strikte Minimum reduzéiert ginn, fir dass d'Kand esou séier ewéi méiglech eng effektiv Hëllef kritt. Den SNE/CGFP fuerdert, dass et zu engem Paradigmewiessel komme muss. D'Hëllef um Kand muss un éischter Plaz stoen, an net d'Prozedur.

- Dass **bei klengen Kanner e systematesche Screening** verbindlech agefouert gëtt mam Zil, sproochlech Stéierunge fréistméiglech ze diagnostizéieren. Dëst sollt an den Ae vum SNE/CGFP am Kader vum « Bilan 30 » geschéien. De « Bilan 30 » ass en entscheidend Instrument, fir ganz fréi Sproochentwécklungsstéierunge bei Kanner ze identifizéieren a scho fréizäiteg ze intervenéieren, andeems Fördermoosname fir d'Sproochentwécklung ergraff kéinte ginn iert d'Kand an den Zykel 1 kënnt.

- Dass **d'Elteren** déi proposéiert Hëllefsmesurë fir hiert Kand, dat Hëllef brauch, net refuséiere kënnen am Fall, wou déi Professionell sech eens sinn a scho vill Ressourcen investéiert goufen, fir de Bilan vum Kand ze erstellen a vill Efforte gemaach goufen, fir dem Kand ze hëllefen.



D'Wuelbefannen, d'mental Gesondheet vun den Enseignanten

D'Wuelbefannen an d'mental Gesondheet vun den Enseignantë sinn enk verknëppt mat der Problematik vun der Betreuung vu verhalensopfällege Schüler oder vu Schüler mat spezifische Besoinen. **De Manktem u Ressourcen an un Ënnerstützung** féiert derzou, dass eng steigend Zuel un Enseignanten ëmmer méi Schwieregkeeten hunn, dëser Erausforderung gerecht ze ginn. Ëmmer méi Enseignantë packen de Spagat net méi tëschent dem Usproch, dee si u sech selwer stellen, all de Kanner gerecht ze ginn an der Wierklechkeet an hirer Klass. Dës Hëlleflosegkeet féiert an enger éischer Phas zu Frustratiounen, mee ka sech op Dauer och méi negativ op hirt physescht, mentaalt a psychescht Wuelbefannen auswierken. Et ass e Fait, dass sech ëmmer méi Enseignanten epuiséiert fillen, riskéieren an de Burnout ze falen oder schonn doranner sinn.

Fir d'Wuelbefanne vun den Enseignanten ze verbessere fuerdert den SNE/CGFP dofir de MENJE op, all senge Fuerderungen den Encadrement vu Kanner mat spezifische Besoinen oder mat spezielle gesondheetleche Besoine betreffend Rechnung ze droen. Mee d'Wuelbefanne vun den Enseignanten hänkt nach vun anere Facteuren of.

a)

D'Intensitéit an d'Aarbechtszäit, déi den Enseignant ze leeschten huet

D'Iwwerlaaschtung un Aarbecht huet an de leschte Joren ëmmer méi zougeholl. D'Aarbechtszäit ass ëmmer méi laang ginn, notamment well den administrativen Opwand zougeholl huet an d'Enseignanten et ëmmer méi schwéier kréien, ofzeschalten, well si vill vun de Problemer aus hirem Berufsalltag mat heem huelen an zu allen Zäiten erreechbar sinn. Och sinn et oft d'Contraintë vum Programm, déi den Aarbechtsrhythmus vun den Enseignantë bestëmmen an déi och zu engem Stressfacteur fir den Enseignant kënne ginn. D'Objektiver, déi den Enseignant fir d'Aarbecht mat senge Kanner imposéiert kritt, sinn dacks net realistesch oder ganz vag a féieren zu Stress, well hien se net erreeche kann.

b)

Déi emotional Stressfacteuren

An der Elterenaarbecht kënn et ëmmer méi dacks zu **Spannungen a Konfliktsituatioune** mat Elteren, déi den Enseignant zousätzlech belaaschten. Déi Belaaschtung kascht vill Energie a kann a ganz schlëmme Fäll esouguer zu Angschtgefiller féieren. D'Enseignantë vermessen och dacks d'Ënnerstützung vun hire Virgesetzten an den Autoritéiten, wa si ongerechtferlegt vun Elteren ugegraff ginn.

Den SNE/CGFP fuerdert dofir:

- Dass den administrativen a bürokrateschen Opwand op e strikte Minimum reduzéiert gëtt.
- Dass d'Digitaliséierung vu Prozeduren eng reell Erliichterung fir d' Enseignantë mat sech bréngt.
- Dass d'Enseignanten en « Droit à la déconnection » hunn an net zu all Moment müssen erreechbar sinn.
- Dass d'Enseignanten déi néideg Ënnerstëtzung vun hire Virgesetzte kréien, wann et zu Konflikter mat Eltere kënnt.
- Dass weider spezifesche Hëlfsstrukture geschafe ginn, op déi den Enseignant kann zeréckgräifen, wann et him emotional schlecht geet. D'Enseignantë missten och scho preventiv op esou Strukturen, déi eng psychologesche Hëllef ubidden, zeréckgräife kënnen, fir ze verhënneren, dass si an eng emotional lwwerbelaaschtung falen.





Attraktivitéit vum Beruff

Den SNE/CGFP stellt fest, dass **ëmmer manner Jonker** sech fir e Studium an Erziungswëssenschaften a fir de Beruff vun der Léierin oder dem Schoulmeeschter entscheiden. Och sichen ëmmer méi Enseignanten, déi an de Schoule mat Kanner schaffen, eng aner Erausforderung andeems si aner Posten am Secteur vun der Educatioun ustriewen, wou si net méi am Kontakt mat Kanner sinn.

Leider ginn et och ëmmer méi Enseignanten, déi der Schoul de Réck dréinen an an anere Secteure hir berufflech Zukunft sichen.

Den SNE/CGFP bedauert, dass d'Schoulhalen an de Beruff vun der Léierin an dem Schoulmeeschter net méi attraktiv ze si schéngen. Dëse Beruff ass jo ee vun deenen erfëllensten, deen et gëtt, mee natierlech just, wann d'Konditioune stëmmen. An do läit d'Kromm an der Heck. Ee vun de Grënn, dass den Enseignantsberuff un Attraktivitéit verluer huet, läit sécherlech an der Verschlechterung vun den Aarbechtskonditiounen, déi enk verknëppt si mat dem Thema vun dem Wuelbefanne vun de Enseignanten op hirer Aarbechtsplaz. Déi negativ Auswierkunge vum Contingent, de Manktem u Ressourcë bei der « Prise en charge » vu Kanner mat Verhalensopfällegkeeten oder spezifesch Besoinen, wéineg Ënnerstëtzung bei Konflikter mat Elteren droen net derzou bäi, den Enseignantsberuff attraktiv ze maachen.

E weidere Grond fir déi negativ Entwécklung bei der Attraktivitéit läit och doranner, dass de Beruff vun der Léierin an dem Schoulmeeschter **net genuch valoriséiert ass**. Vill Leit erkennen déi wichteg Roll net méi, déi d'Enseignantë fir d'Gesellschaft spillen. D'Valorisatioun vum Beruff ass enk gekoppelt un d'Ausbildung vun den Enseignanten an un d'Karriärspektiven, déi domadder zesammenhänken. De Prestige vun engem Beruff geet eben och Hand an Hand mat dem Ausbildungsniveau, dee fir dee Beruff verlaangt gëtt.

Dofir fuerdert den SNE/CGFP,

dass an Zukunft all d'Léierinnen a Schoulmeeschteren op **Masterniveau** rekrutiert ginn an dass si an d'Mastercarrière A1 klasséiert ginn.

Zousätzlech dozou fuerdert den SNE/CGFP, dass de MENJE ëffentlech drop hiweise géif, wat fir eng wäertvoll Aarbecht an de regulären ëffentleche Schoule gelescht gëtt. Den Terrain soll mediewierksam valoriséiert ginn. Domadder géif een dem Personal e positive Feedback ginn.





Evaluatioun vun de Reformen a Neierungen zënter 2009

Den SNE/CGFP stellt fest, dass zënter 15 Joer eng ganz Rei Reformen a Neierungen am « Enseignement fondamental » agefouert goufen. An dësem « Cahier des charges » beschränkt den SNE/CGFP sech op déi Mesuren an Elementer, bei deenen et him wichteg erschénkt, Fuerderungen ze stellen.

• **Contingent**

Den SNE/CGFP fuerdert, dass **de Berechnungsmodus vum Contingent** onbedéngt esou ëmgeännert muss ginn, dass et zu enger Erhéijung vun de Ressourcen, iwwert déi d'Schoule verfüge kënnen, kënnt.

Dofir muss d'Klassemoyenne fir d'Berechnung vum Contingent vu 16 op 15 erofgesat an den Impakt vum « Indice social » vun 20 op 25 % eropgesat ginn. Ausserdeem müssen d'Schüler mat spezifische Besoinen och onbedéngt am Contingent berücksichtegt ginn andeems weider Ressourcen dofir fräigesat ginn.

• **« Appui pédagogique »**

Den SNE/CGFP fuerdert, dass, wéi bis elo, eng **gréisstméiglech Flexibilitéit** an der Organisatioun vum « Appui pédagogique » erhale bleift. D'Schoule solle weiderhi selwer kënnen decidéieren, bei wéi den « Appui pédagogique » soll gehale ginn. D'Enseignante müssen déi néideg Flexibilitéit an deen néidegen Handlungsspillraum behalen, fir den « Appui pédagogique » esou ze organiséieren, wéi et fir d'Schoul an d'Kanner am beschten ass. Den SNE/CGFP wiert sech och mat aller Vehemenz géint all Versuch, d'Enseignanten ze forcéieren, hiren « Appui pédagogique » an « Enseignement direct » ëmzewandelen.

• **Hausaufgabenhëllef an e-Bichelchen**

Den SNE/CGFP fuerdert, dass um aktuelle Modell vun der Hausaufgabenhëllef näischt geännert gëtt a wiert sech mat aller Vehemenz géint all Versuch, dass dës Tâche vun der Hausaufgabenhëllef op d'Schoul an un d'Léierpersonal ze iwwerdreien.

Doriwwer eraus fuerdert den SNE/CGFP, dass de Gebrauch vum e-Bichelchen och an Zukunft muss fakultativ bleiwen, och, well munnech Gemengen an eege Kommunikatiouns-Tools investéiert hunn.

- **« Allongement de cycle »**

Den SNE/CGFP fuerdert, dass dës Allongementer och schonn am 1. Joer vun all Zykel kënnen decidéiert ginn, an dat och an deene Fäll, wou keen Dossier CI besteet.

- **Passage Fondamental – Secondaire PFS**

Den SNE/CGFP fuerdert eng Reform vun der Orientéierungsprozedur am Zykel 4 vum « Enseignement fondamental ». An Zukunft müssen d'Pedagogen dës Entscheidungen treffen kënnen, nodeems si iwwert den Elteren hir Virstellung informéiert goufen. No der Entscheidung vun de Pedagoge géifen d'Elteren natierlech d'Méiglechkeet vun engem Recours kréien, an zwar a Form vun engem « Examen-recours ».

- **Schoukkomitee**

D'Tâchë vun de Schoukkomiteeën an dem President vum Schoukkomitee hunn zënter der Reform vun 2009 ganz vill an der Envergure zougeholl.

Dofir fuerdert den SNE/CGFP, dass all d'Schoukkomiteeën eng administrativ Hëllef a Form vun engem Sekretariat kréie mussen.

Ausserdeem fuerdert den SNE/CGFP, dass de « Règlement grand-ducal » vum 27. Abrëll 2009 iwwert d'Schoukkomiteeën iwwerschaft an der Realitéit ugepasst gëtt. Besonnesch müssen do verschidde Prozedure vereinfacht ginn. Ervirehiewen ass e.a. de Berechnungsmodus vun der Zuel vun den Déchargé vum Komitee, deen net méi der Realitéit vun haut entsprécht. Sou ginn an der Berechnung d' « Remplaçants permanents » an d'Leit vun der ESEB, a geschwënn och d'A-EBS, nach ëmmer net matgezielt. Dobäi brauchen och déi Leit an de Schoulen Usprichpartner a gi mat vun de Schoukkomiteeë geréiert.

- **Wal vun den Elterevertrieder**

Dës Wal ass immens schwéierfällig a verlaangt en enormen administrativen Opwand vum Schoukkomitee an der Gemeng. D'Envergure vun dëser Wal ass iwwerdimensionéiert an dofir fuerdert den SNE/CGFP och eng Reform vun dëser Walprozedur.



Zweeten Intervenant am 1. Zykel

Den SNE/CGFP fuerdert,

dass den 2. Intervenant, deen am Koalitiounsaccord virgesinn ass, **an all Klassen** aus dem Zykel 1 nom Modell vum Precoce mat engem Team bestoend aus engem Enseignant an engem Educateur intervenéiere soll.

Wéi am Precoce soll den 2. Intervenant all Dag während der ganzer Unterrichtszeit mam Enseignant zesummeschaffen.

Den SNE/CGFP wiert sech mat aller Vehemenz géint d'Iddi, dass den 2. Intervenant just sporadesch an d'Klass kënn, fir dass den Enseignant dann Zäit krit, fir mat engem klengen Grupp eng Aktivitéit ronderëm dat phonologescht Bewosstsinn ze maachen.





Modernisatioun vum « Plan d'études » an d'Konsequenzen dovunner

Den SNE/CGFP fuerdert am Kontext vun der Modernisatioun vum « Plan d'études »:

- Dass ee sech beim Ausschaffen a bei der Implementatioun vum neie « Plan d'études » soll Zäit loossen a näischt iwwer de Knéi brieche soll. Et sollt een eng « Phase d'implémentation », eng Adaptatiounsphas, virgesinn, fir den Enseignanten d'Méiglechkeet ze ginn, sech mam neie « Plan d'études » vertraut ze maachen, sech doranner anzeschaffen an eventuell Problemer opzedecken, fir dass dann déi néideg Adaptatioune kënne gemaach ginn.
- Dass den neie « Plan d'études » par Rapport zum aktuellen Dokument entschlaakt gëtt a sech op déi wichtigst Kärkompetenze beschränkt.
- Dass den neie « Plan d'études » e praktescht Instrument gëtt, wat fir den Enseignant a senger aldeeglecher Unterrichtspraxis eng reell Hëllef duerstellt.
- Dass d'Evaluatiounspraktiken an d'Bilanen dem neie « Plan d'études » ugepasst ginn. Mir brauchen eng verständlech an transparent Evaluatioun, déi esouwuel vun de Kanner wéi och vun den Eltere verstane gëtt. Des Weidere fuerdert den SNE/CGFP nees d'Aféierung vun enger chiffrierter Bewäertung am Zykel 4. Eng chiffriert Evaluatioun ass och am Hibleck op d'Orientéierungsprozedur am Zykel 4 an d'schoulesch Zukunft am « Enseignement secondaire » ganz wichtig. Och fuerdert den SNE/CGFP, dass d'Bilane méi lieserlech a verständlech musse ginn.





Alphabetisiering op Franséisch

Den SNE/CGFP ass sech der Sproocheproblematik zu Lëtzebuerg duerchaus bewosst an ass och prinzipiell oppe fir eng Flexibilisiering vun der schoulescher Offer innerhalb vum traditionelle lëtzebuergesche Schoulsystem.

An dofir bleift den SNE/CGFP och bei senger Positioun, sech dem Pilotprojet vun der Alphabetisiering op Franséisch net ze verschléissen, mee dëse kritesch ze begleeden.

An deem Kontext fuerdert den SNE/CGFP:

- Dass de Projet, esou wéi et am Koalitiounsaccord och virgesinn ass, wëssenschaftlech evaluéiert gëtt. Den SNE/CGFP insistéiert awer dorobber, dass dës Evaluatioun seriö, onofhängeg a wäitreechend muss erfollegen. All d'Resultater mussen integral öffentlech gemaach, kontrovers diskutéiert an analyséiert ginn an op där Basis mussen dann d'Decisioune getraff ginn.
- Dass d'Acteure vum Terrain an d'Evaluatioun mat agebonne ginn, well si all Dag mat de Kanner schaffen an am beschte wëssen, wou et Problemer ginn a wat gutt leeft.
- Dass Schüler, déi op Däitsch oder op Franséisch alphabetiséiert ginn, an der Phas vun der Alphabetisiering an an der Mathematik getrennt vuneneen ënnerriicht ginn.
- Dass, am Fall vun enger generaliséierter Aféierung vun der Alphabetisiering op Franséisch op Landesniveau, all d'Schoulen iwwert déi selwecht Ressourcen a Moyene verfüge mussen, wéi se och fir de Pilotprojet zur Verfügung gestallt goufen.
- Dass, am Fall vun enger Generalisatioun vum Projet, d'Alphabetisiering op Franséisch net gläichzäiteg an all de Schoule geschitt. Den SNE/CGFP fuerdert, dass dës Aféierung etappeweis, an net an engem Coup, flächendeckend realiséiert gëtt.



D'Bäibehale vum « Enseignant généraliste »

D'Ausbildung vun de Schoulmeeschteren an de Léierinnen erlaabt et hinnen aktuell, all d'Fächer aus der Grondschoul op engem qualitativ héijen Niveau ze enseignéieren. D'Enseignanten aus der Grondschoul sinn also Generalisten an den SNE/CGFP setzt sech derfir an, dass dat och esou bleift.

Den SNE/CGFP wiert sech mat aller Vehemenz géint all Bestriewungen, déi et Leit mat enger anerer Ausbildung wéi déi vum Schoulmeeschter an der Léierin erlaben, verschidde Fächer aus der Grondschoul ze ënnerriichten. Et kann net sinn, dass Leit mat enger Ausbildung fir e bestëmmtent Fach Virrang virum « Enseignant-généraliste » kréien a just dat Fach an der Grondschoul enseignéiere fir dat si ausgebilt goufen. Dat géif eng massiv Benodeelegung fir de Generalist, also de Schoulmeeschter an d'Léierin bedeiten.

Den SNE/CGFP fuerdert vum MENJE **ekloert Bekenntnis zum Generalist.** Professioneller aus anere Berufsgruppe kéinten deemno keng Stonnen an der Grondschoul prioritär prestéieren.

Wat d'Schwammen ubelaangt, wier et fir den SNE/CGFP denkbar, dass d'Schwammmeeschteren a Kooperatioun mam Enseignant de Schwammunterrecht kéinten assuréieren. Den SNE/CGFP ënnersträicht awer, dass dës Interventioone vun de Schwammmeeschteren ëmmer müssen an Zesummenaarbecht an an enker Concertatioun mat de Schoulmeeschteren a de Léierinne geschéien.





Gehälterforderungen

Wat d'Gehälter ubelaangt, **fuerdert den SNE/CGFP** :

- Dass den aktuelle « Supplément de traitement » vun 20 Punkten « en fin de carrière » duerch en Allongement vun engem 17. Echelon (mat 500 Punkten) ersat gëtt.
- Dass de Plafonnement vu 500 Punkte fir d'Enseignanten « en fin de carrière » opgehewe gëtt.
- Dass de reduzéierende Facteur vu 36/52stel an der Formel fir d'Berechnung vun der Indemnitéit fir lwwerstonne gestrach gëtt, fir dass dës geleschten Aarbecht d'selwecht bezuelt gëtt wéi Stonnen, déi innerhalb vun der regulärer Tâche gelescht ginn.



PERIODIQUE



Envois non distribuables à retourner à:
L-3290 BETTEMBOURG

Port payé
PS/161